



Broj: 01/6-50-1-32-14/05
Sarajevo, 31.03.2005.

Z A P I S N I K

sa 14. sjednice Komisije za saobraćaj i komunikacije, održane 31.03.2005. godine

Sjednica je održana 31.03.2005. godine sa početkom u 11,00 sati.

Sjednici su prisustvovali članovi Komisije:

- | | |
|---------------------|---------------------|
| 1. Miloš Jovanović, | 5. Nenad Mišić, |
| 2. Selim Bešliagić, | 6. Ruža Sopta i |
| 3. Izet Hadžić, | 7. Milorad Živković |
| 4. Ivo Lozančić, | |

Članovi Komisije: Adem Huskić i Muhamed Moranjkić iz opravdanih razloga nisu prisustvovali sjednici.

U ime Vijeća ministara BiH sjednici je prisustvovao Zdravko Šavija. Filip Andrić je prisustvovao sjednici ispred Kluba poslanika HDZ – predlagača amandmana. Sjednici su prisustvovali i: Daniel Lindvall, ispred OHR-a, Frane Marojević, ispred Eu i Isanović Edin, ispred Istraživačkog centra PS BiH. Sjednici je prisustvovao sekretar Komisije Vedran Hadžović.

Predsjedavajući Miloš Jovanović je predložio sljedeći:

D N E V N I R E D

1. Verifikacija Zapisnika sa 13. sjednice, održane 21. 03. 2005. godine,
2. Prijedlog zakona o Javnom radio-televizijskom sistemu Bosne i Hercegovine, predlagač Vijeće ministara BiH,
3. Dogovor o narednoj sjednici i ostala pitanja.

Dnevni red je jednoglasno prihvaćen.

Ad. 1. Verifikacija Zapisnika sa 13. sjednice, održane 21. 03. 2005. godine

Bez primjedbi, Komisija je jednoglasno verifikovala zapisnik sa 13. sjednice, održane 21. 03. 2005. godine.

Ad. 2. Prijedlog zakona o Javnom radio-televizijskom sistemu Bosne i Hercegovine, predlagač Vijeće ministara BiH,

Predsjedavajući je istakao da su na predloženi zakon amandmane uložili: Klub poslanika HDZ i poslanici Adem Huskić i Selim Bešlić, ta da je u skladu sa Zaključkom sa 13. sjednice Komisije predhodno održan konsultativni sastanak predstavnika Kluba poslanika HDZ, predstavnika predlagača Zakona, Ureda Visokog predstavnika i Evropske komisije. Takođe je napomenuo da je od Javnog RTV servisa BiH dostavljen odgovor, na osnovu Zaključka sa 13. sjednice Komisije o: okvirnim sredstvima potrebnim za pokrivenost cjelokupne teritorije BiH RTV signalom i za uvođenje dodatna dva TV kanala u okviru Javnog RTV servisa BiH, te izvještaj o nalazima finansijske revizije poslovanja Javnog RTV servisa BiH za 2004. godinu.

Nakon toga, predsjedavajući je otvorio opću raspravu o načelima Prijedloga zakona.

U raspravi su učestvovali svi prisutni članovi Komisije, predstavnik predlagača Zakona i ostali prisutni sjednici.

Predstavnik predlagača zakona, Zdravko Šavija, je istakao da bi emisiona mreža za pokrivenost 98% teritorije BiH RTV signalom koštala oko 15 miliona KM, uz 5,5 miliona KM za održavanje mreže godišnje, kao i 2,5 miliona KM za studijsku tehniku, te da bi se značajna sredstva godišnje izdvajala za autorska prava, plate zaposlenim i za druge troškove. Dakle, oko 40 miliona KM je potrebno da bi se osigurao jedan TV kanal za BiH, s tim da bi regulatorna agencija za komunikacije morala da iznađe radijske i TV kanale za pokrivanje kompletnog prostora BiH.

Daniel Lindvall i Frane Marojević su istakli da je međunarodna zajednica spremna finansijski podržati pokrivenost gledanosti na cijeloj teritoriji BiH i da je uslov i cilj Zakona samoodrživ sistem koji omogućava jednaka prava konstitutivnih naroda na svoj jezik i pismo, a da postojeća ekonomska situacija realno ne daje mogućnost uvođenja dodatnih kanala. Polazeći od zahtjeva Vijeća Evrope i Komiteta ministara o finansijskoj samoodrživosti, uređivačkoj nezavisnosti i institucionalnoj samostalnosti javnih RTV servisa i uslova Evropske unije da treba usvojiti zakon o Javnom sistemu i osigurati dugoročnu finansijsku održivost jedinstvenog RTV sistema BiH, čije će sastavne RTV kuće dijeliti zajedničku emisionu i prijenosnu infrastrukturu, prezentiran je amandman koji je OHR ponudio na konsultativnom sastanku, u kom je predloženo da Vijeće ministara, na osnovu analiza i preporuka Komisije, odlučuje o uspostavljanju novih kanala i drugim mogućim reformama sistema javnih RTV emitera u BiH.

Ruža Sopta i Filip Andrić su ukazali na to da bi u zakonu trebalo predvidjeti da Vijeće ministara, najkasnije do 30. 06. 2006., osigura sve finansijske i tehničke uslove za emitiranje programa Javnog BHRT servisa na tri kanala, na tri jezika konstitutivnih naroda, i za to u narednom periodu osigurati potrebna sredstva. Ovaj prijedlog, kako su istakli, u punoj je saglasnosti sa Evropskom konvencijom o zaštiti osnovnih ljudskih prava i sloboda, Evropskom poveljom o regionalnim jezicima i jezicima manjina i drugim međunarodnim dokumentima koje je prihvatila BiH i koji imaju pravnu snagu ustavnih odredbi. Takođe, već sada u BiH postoje tri kanala (JRT servis BiH, FTV i RTRS), što finansijski ne zahtjeva značajna dodatna sredstva, te da je potrebno osigurati njihovu gledanost na cijeloj teritoriji BiH. Naveli su i stav ad hoc komisije Parlamenta Federacije BiH koji ide u tom pravcu.

Milorad Živković je postavio pitanja:

1. Da li će ustavnost zakona biti potvrđena na Ustavnom sudu BiH;
2. Da li je amandman OHR-a prihvatljiv za Vijeće ministara;
3. Da li su tri ministra iz hrvatskog naroda glasali za predloženi zakon, i
4. Kako naplatiti RTV pretplatu od pripadnika hrvatskog naroda?

Zdravko Šavija, predstavnik predlagača, je odgovorio da:

1. Ustavno-pravna komisija je dala pozitivno mišljenje o ustavnosti prijedloga ovog zakona;
2. Da je amandman OHR-a prihvatljiv za obrađivača zakona;
3. Da je prijedlog zakona jednoglasno podržan od Vijeća ministara, uključujući i predstavnike hrvatskog naroda;
4. Da će pripadnici hrvatskog i ostalih naroda najvjerojatnije plaćati RTV pretplatu kad se osigura i kvalitetna gledanost programa.

U osnovnom zakonodavnom postupku, nakon provedene opće rasprave o principima Prijedloga zakona, pristupilo se glasanju.

Komisija nije podržala principe Prijedloga zakona o Javnom radio-televizijskom sistemu Bosne i Hercegovine, sa tri glasa za, tri glasa protiv i jednim suzdržanim glasom.

Za izvjestioca, u ime Komisije, određen je Miloš Jovanović, predsjedavajući Komisije.

Ad. 3. Dogovor o narednoj sjednici i ostala pitanja

O terminu naredne sjednice, članovi Komisije će se dogovoriti 12.04.2005. g. Na zasjedanju Predstavničkog doma.

Komisija je zaključila da se uputi dopis Vijeću ministara BiH u kom će se zatražiti informacija dokle se stiglo sa planovima i aktivnostima na izgradnji koridora VC i planovima mreže izgradnje magistralnih putnih pravaca u BiH.

Kako nije bilo drugih prijedloga za ovu tačku dnevnog reda predsjedavajući je u 12,30 sati zaključio sjednicu.

SEKRETAR KOMISIJE
Vedran Hadžović

PREDSJEDAVAJUĆI KOMISIJE
Miloš Jovanović